

Qalam

131, Dhu al-Hijjah 1380, Jun 1961, 60 sen

Selamat Melaksanakan Tujuan

Hari Raya Korban

Dalam suasana yang meriah dan penuh dengan kerohanian yang melimpah, umat Islam di tanah air dan di seluruh dunia merayakan hari raya Aidil Adha – Hari Raya Korban.

Hari yang mulia dan maha berkat itu telah dirayakan dengan rasa kesyukuran ke hadrat Allah ‘*Azza wa Jalla* atas limpah rahmat-Nya dan nikmat-nikmat kurniaannya yang tidak terhitung.

Allah Maha Suci Engkau!

Pada hari yang berbahagia itu, suara takbir dan tahmid yang bergema di angkasa, yang dilayangkan oleh beratus-ratus ribu orang-orang haji yang sedang berhimpun di tanah suci Makkah al-Mukarramah, telah disahut oleh suara takbir dan tahmid umat Islam dari keempat-empat penjuru dunia, dari tanah air kita Tanah Melayu – santak ke negara Maghribi di tepi Lautan Atlantik, dan dari Tanjung Harapan di Afrika Selatan – santak ke wilayah-wilayah Islam di negeri-negeri Turkistan dan China.

Sekaliannya bersatu padu, diikat oleh kalimah

tauhid yang teguh kukuh, sebagai satu umat yang telah disifatkan oleh Allah Ta‘ālā menjadi sebaik-baik umat yang terbentuk di tengah-tengah masyarakat manusia.

Tiap-tiap seorang kita, Muslim sejati, yang insaf dan sedar, sudah barang tentu telah dapat mengecap faedah-faedah dan pengajaran-pengajaran yang mulia yang tersemat di dalam ibadah Hari Raya Korban, untuk menyegarkan jiwa dan menguatkan semangat keislaman.

Dengan iman yang mendalam dan azam yang bulat – setelah dapat memungut mutiara pengajaran yang terkandung di dalam ibadah hari raya yang mulia itu – tiap-tiap seorang Muslim yang insaf dan sedar serta mendapat taufik Allah *Azza wa Jalla*: akan sentiasa sedia berkorban untuk menegakkan agamanya dan kebaikan masyarakatnya.

Tetapi orang yang lemah dan menderitanya, tidak akan dapat memberikan pengorbanan yang semestinya, malah ia sendiri mengharapkan bantuan. Kerana inilah Islam membuka mata pemeluknya supaya mereka tampil berjuang menentang segala penderitaan, lebih-lebih lagi menentang kezaliman yang menjadi punca segala kepincangan hidup!

Islam mewajibkan zakat dan haji, sedang kedua-duanya tidak dapat dilaksanakan melainkan oleh orang-orang yang berharta benda. Oleh itu, nyatalah bahawa dua rukun Islam ini menjadi penggalak supaya tiap-tiap seorang Muslim ini berusaha mencari kekayaan yang halal, bukan sahaja setakat mengambil tempat yang selayaknya, sejajar dengan bangsa-bangsa asing yang kaya raya, tetapi dengan kekayaan yang halal itu ia akan dapat mencari keredhaan Allah

dan beroleh pahala yang berganda-ganda dengan mengeluarkan zakat,
menunaikan ibadat haji dan juga menghulurkan derma
dan khairat.

Semuanya ini tidak akan dapat dicapai dengan doa
dan rayuan semata-mata, tetapi dengan ikhtiar-ikhtiar dan
amal perbuatan yang rapi, yang bersendikan tekun,
rajin dan ilmu. Demikianlah hendaknya.

Akhirnya pada saat yang berbahagia ini, kita mengambil
peluang mengucapkan Selamat Hari Raya, dan selamat
menjalankan tujuan dan pengajaran yang tersimpul di dalam
ibadat haji dan hari raya korban, sambil berdoa
ke hadrat Ilāhī Rabbī, mudah-mudahan saudara-saudara kita umat
Islam yang telah berbahagia menunaikan rukun Islam yang kelima
itu akan kembali ke tanah air dengan selamat dan sihat
wa al-‘āfiat serta beroleh haji mabrur – Amīn.



*Suatu pemandangan dalam persidangan kira-kira 100 badan Melayu dan Islam Singapura yang telah bersidang
baharu-baharu ini dan memutuskan sebulat suara: Menuntut kerajaan Singapura menarik balik “Rang
Undang-undang Pentadbiran Islam 1960” untuk disemak dan dikaji semasak-masaknya oleh alim ulama
Majlis Penasihat Islam dengan bantuan alim ulama yang bukan ahli majlis itu.*

*Perjumpaan yang bersejarah ini dianjurkan oleh PAS cabang Singapura. Gambar menunjukkan anggota-anggota
pimpinan majlis sebelum persidangan itu dipengerusikan oleh Kiyai Muhammad Fadhlullah Suhaimi.*

*Keterangan gambar, dari kiri: U. Muhammad Tahir Mahmud (Setiausaha PAS Singapura), U. Yaacob
Muhammad – Setiausaha Parlimen Kementerian Pembangunan (Pemerhati Istimewa), Ustaz Taha Suhaimi (Yang di-Pertua
PAS Singapura), Ustaz Syed Ahmad Dahlan al-Husaini (Naib Yang di-Pertua PAS Singapura), Syed Junied
bin Muhammad Aljunied dan U. Dahlan bin Haji Yusuf (Kedua-duanya pegawai PAS Singapura).*